

**TUR VEHICULO CU
WORDO KITA DOR
POLIS TA BAY R.S.I.**



WWW.SOLODIPUEBLO.COM



SOLODIPUEBLO@GMAIL.COM

Ata mas prueba: E biaha aki tocante
jaarrekening

**CAFT TA BOLBE DESENMASCARA
E GAÑAMENTONAN DI GERLIEN!**



Opinion personal di Parlamentario
Evelyn Wever-Croes
**E MINISTER NOBO Y ESUN
TRAS DI CORTINA**

**NIUN HENDE NO SA
DI NADA: LUCHTBED
COLOR BLAUW
HAYA DEN LAMA SIN
HENDE RIBA DJE**



**INTELIGENCIA ARTIFICIAL
DEN RECURSO HUMANO NA
ARUBA TOURISM AUTHORITY**

A.T.A. promer den Caribe cu AI pa medio di AFAS



Opinion personal di Parlamentario Evelyn Wever-Croes

E MINISTER NOBO Y ESUN TRAS DI CORTINA



Integridad di nos institutonan democratico ta basa riba un principio fundamental: separacion di poder. Ora un miembro di Parlamento, e organo di control mas halto den nos sistema, ta bai forma parti di e gobierno, tras di cortina, nos no tin un gobierno transparente mas, pero un sistema

politico pa apariencia, cu ta mina confiansa di pueblo den nos sistema politico.

E minister nobo di Infraestructura, Energia y Comunicacion, señor Herde, a bisa abiertamente cu e lo uza e expertisio di miembro di Parlamento Mike de Meza den su

funcion como minister. Mike de Meza tabata un candidato pa minister, pero no a pasa e screening segun e Ley di Integridad di (candidato pa) ministernan. E resultado di e screening ey tabata cla: e NO por ocupa un puesto di minister aworaki.

Pero awor e minister nobo, kier laga e persona cu no por bira minister oficialmente, bai goberna toch y influencia decisionnan di gobierno via un “rol informal” tras di cortina. Esaki ta totalmente inaceptabel.

Nos Constitucion ta prohibi esaki!

Articulo III.7 di nos Constitucion ta prohibi un miembro di Parlamento pa ocupa un funcion den gobierno. Esaki ta pa evita conflicto di interes y pa garantisa cu control riba e gobierno ta tuma lugar den forma independiente y sin presion. Ora un

miembro di Parlamento ta bai participa den e decisionnan di gobierno, maske ta djis “pa duna conseho”, e regla aki den nos Constitucion ta wordo viola. Con nos por confia cu e parlamentario por controla y hasi su trabou como parlamentario riba un ley cu e mes a conseha e minister riba dje?

Un minister vulnerabel!

Minister Herde ta pone su mestambeden un situacion hopi fragil y vulnerable. E ta cuminsa su periodo ministerial cu un forma di trabou cu ta contra tanto e espiritu como e letra di nos Constitucion. Si despues resulta cu “su” decisionnan a wordo influencia pa e parlamentario, e daño politico no lo ta pa e consehero so, sino principal pa e minister mes. Esaki ta hasta merita un mocion di desconfiansa contra e minister.

Kiebro di integridad

E Ley di Integridad di Ministernan ta existi pa un motibo, pa protehe pueblo contra mal gobernantenan. Si un persona cu no pasa e screening, toch ta haya oportunidad pa manda den e ministerio via un porta di patras of tras di cortina, nos ta bira testigo di un debilitacion di nos sistema legal y kiebro di integridad.

Conclusion

Fraccion di MEP lo sigui pone e tema aki riba mesa. Si nos laga e ley wordo trata djis como un formalidad, e pueblo lo perde confiansa den un gobierno. Y no lubida cu ta apenas 300 voto di diferencia a crea e constelacion actual di gobierno. Nos mester tin e balor di sirbi pueblo cu integridad, y no simplemente pa lealtad politico!

Evelyn Wever-Croes

PARTICIPA NA “BAN WIKI!” — UN ENCUENTRO EDUCATIVO DI PA WIKIPEDIA RIBA ARUBA

Oranjestad, Aruba – Abo ta interesa den con Wikipedia ta funciona? Bo kier yuda pa muestra cultura, historia, naturalesa y idioma di Aruba na mundo? Uni cu nos den “Ban Wiki!”. E proximo edicion ta tuma lugá diarason, 16 di juli na Biblioteca Nacional, Oranjestad di 5:00 PM te 7:00 PM y diabierna 18 di juli di 10:00 pa 11:30AM online via Google Meet.

Dia 16 di juli nos ta enfoca riba tema di Flora y Fauna di Aruba, cu invitado Greg Peterson

di Aruba Birdlife Conservation. Hunto nos lo explora Wikipedia y Wikidata pa asina agrega nombrenan di parhanan local riba Wikimedia. Lenguage Papiamentu y Ingles. Trece bo laptop of usa un computer di Biblioteca. Lo tin algo pa refresca durante e tayer. Dia 18 di Juli miembronan di e team di coordinador di Wikipedia riba Aruba lo guia bo live, con Wikimedia ta funciona tambe con pa agrega potret riba Wikicommons, traha categoria y engrandece e parti visual di Aruba riba e

plataforma.

Registra bo participacion na tempo, esaki ta importante pa nos por guia e proceso y prepara materialnan necesario. Inscribi pa medio di nos pagina principal: www.wikipediaonaruba.org unda por haya mas informacion relevante manera fuente di informacion y literatura relevante.

Sigui nos, keda conecta y informa. Ban hasi conocimiento accessible hunto!

NIUN HENDE NO SA DI NADA: LUCHTBED COLOR BLAUW HAYA DEN LAMA SIN HENDE RIBA DJE



Area Manchebo - Diamars persona femenino a merdia pa atardi un informa autoridad cu e



lo a mira un vlot/ aired color blauw cu dos persona ariba. Cu otro palabra, e personanan lo tawata den problema.

Polis na su turno a bay na e hotel di unda e informacion/nan a sali, y niun hende tawata sa di algo. Agentenan a papia cu un bartender, e la bisa cu berdad e la mira dicho artefacto riba lama pero no

a mira niun hende ariba of wanta na dje.

Autoridad pa descarta tur cos a opta pa avisa e avion di Marina, cu e momento eynan tawata den vecindario. E avion na su turno a bula e area y berdad a encontra e artefacto color blauw, pero niun hende. Asina mes a keda tira bista pero no ta haya niun hende.

Te cu den oranan di anochi, esta 7'or pasa no haya niun informacion di niun hende cu nan tin un familiar perdi.

Pues, un teoria cu kizas biento duro por a bula e artefacto bente den lama y un persona(hende muhe) probablemente lo a mira e vlot/airbed y ta avisa polis cu segun e lo tawata no 1 pero 2 persona riba dje.

AHATA TA PATROCINA CURICULO CULINARIO NA COLEGIO EPI

Oranjestad, Aruba: Aruba Hotel & Tourism Association (AHATA) a patrocina e gastonan pa modernisa e curiculo di e programa culinario na Colegio EPI. Cu e sosten aki, AHATA ta enfatisa e importancia di un enseñansa culinario avansa na Aruba, garantizando cu nos futuro chefnan ta prepara pa exigencianan di e industria di hospitalidad y por goza di un carera exitoso.

E adaptacion di e curiculo

culinario a wordo implementa door di Chef Calvert Cilie, un miembro valioso di e Culinary Arts Program di EPI desde 1996. Durante su añanan di dedicacion, Chef Cilie a demostra experiencia, boluntad, y liderazgo exepcional den e mundo di enseñansa culinario. Chef Cilie a incorpora e modelonan di HKS y BKD den e programa culinario. E mehoracion strategico aki lo eleva e calidad di enseñansa culinario, door di

introduci metodologianan mas sofisticada, stimula innovacion, y equipa studiantenan cu habilidadnan practico.

E contribucion di AHATA den e desaroyo di e curiculo aki ta un paso clave pa fortalece talento local den e industria culinario di Aruba. AHATA ta keda comprometi na apoyo di iniciativanan cu ta sera e coneccion entre enseñansa y e necesidadnan actual di nos mercado laboral. Presidente y CEO di



AHATA, Sra. Tisa LaSorte a gradici Sr. Cilie, den presencia di Directora General di Colegio EPI, Sra. Ankie Danker, Unit Manager di e facultad di

Hospitalidad y Turismo, Sra. Gloria Vega, y Manager di Curso, Sr. Andres Geerman.

INTELIGENCIA ARTIFICIAL DEN RECURSO HUMANO NA ARUBA TOURISM AUTHORITY

A.T.A. promer den Caribe cu AI pa medio di AFAS



Oranjestad, Aruba-
Dialuna dia 14 di juli a tuma luga lansamento oficial di “Jonas”, un proyecto innovativo entre Aruba Tourism Authority (A.T.A.) y AFAS. Despues di un proceso extenso di desaroyo y preparacion, A.T.A. ta bira e prome cliente den Caribe cu ta implementa e modulo di Inteligencia Artificial (Artificial Intelligence, AI) di AFAS; como “un colega” mas den e Departamento di Recurso Humano di A.T.A.

A diseña Jonas pa brinda sosten 24/7 na e empleadonan di A.T.A., ofreciendo contesta inmediato na

tur pregunta relaciona cu e regulacionnan y e proceduranan interno di e organisacion. A introduci e empleado digital nobo aki na e team completo di A.T.A. durante un evento interno cu a conta cu discurso di e team di Recurso Humano, como tambe un presentacion y demostracion di AFAS.

E meta principal di e implementacion aki ta pa optimalisa e procesonan interno di e departamento di Recurso Humano di A.T.A., permitiendo nan pa enfoca mas riba e desaroyo y bienestar di e talentonan humano, cual ta keda un prioridad pa A.T.A.



Ademas, pronto Jonas lo tin su propio bos, dunando e empleadonan e oportunidad pa interactua cu ne directamente for di

nan celular sin mester di un computer. Esaki lo facilita e acceso na informacion y mehora e experiencia di e personal den nan ambiente

di trabou.

Mescos cu un colega humano, Jonas lo sigui evoluciona y crece den e organisacion.

Parlamentario Xiomara Maduro

Ata mas prueba: E biaha aki tocante jaarrekening CAFT TA BOLBE DESENASCARA E GAÑAMENTONAN DI GERLIEN!



ORANJESTAD - E prueba t'ey! CAft den su ultimo raport ta confirma cu Aruba ta avansa y ta logra fortalece su maneho financiero den cuado di e trabounan di e

Landspakket. E atrasonan cu tabata tin den e entrega di Cuentanan Anual ya a wordo drecha, y jaarrekening 2019 y 2020 ya caba a wordo oficialmente entrega na

Financieel beheer

In het kader van het Landspakket werkt Aruba aan het versterken van het financieel beheer. Aruba boekt hierin voortgang. Zo constateert het CAft dat de achterstanden in de indiening van de uitvoeringsrapportages zijn ingehaald. Daarnaast zijn de jaarrekeningen over 2019 en 2020 inmiddels ingediend bij de Algemene Rekenkamer Aruba, en volgen de resterende jaarrekeningen later dit jaar.

Algemene Rekenkamer Aruba.

Esaki ta e mesun informacion cu largo tempo Gerlien tabata keda nenga y tabata uza pa crea duda den pueblo contra e esfuersonan grandi cu Gabinete Wever-Croes a haci pa drecha e desaster cu e AVP di Gerlien a laga

atras na 2017.

Nos tur por corda con Gerlien tabata grita cu nos kier sconde e berdad, pero awor ta CAft mes ta bisa bon cla cu Aruba ta cumpli! E resto di e jaarrekeningnan a keda pa su colega Wever entrega y ya caba e por a entrega 2021 y 2022 manera nos a anticipa.

Tur e informacion aki na varios ocasion nos a splica Gerlien, Parlamento y Pueblo di Aruba, pero Gerlien ainda a keda scohe pa gaña Pueblo. Sinembargo e berdad ta sali na cla y CAft ta publica esaki pa tur hende lesa y compronde con di mala fe Gerlien ta.

SECRETARIA GENERAL DI COA SRTA. NICOLE HOEVERTSZ A TOPA CU ATLETANAN DI TAEKWONDO TEAM ARUBA NA AEROPUERTO DI MIAMI

Den fin di Siman Srta. Nicole Hoevertsz a topa cu e atletanan di Taekwondo Team Aruba cu a biaha pa un camp training. E camp training ta parti di e preparacion di 2026. Srta. Nicole Hoevertsz a hiba un conversacion cu e atletanan y a splicanan con importante ta pa haci deporte y a encurashanan pa nan sigui haci deporte.

Srta. Nicole Hoevertsz a deseanan hopi exito den nan careda deportivo y pa nan sigui cu nan meta pa yega na titulonnan grandi pa Pais Aruba.

E Atletanan di Taekwondo Team Aruba a gradici Srta. Hoevertsz pa su palabranan.



Ta trata di vehiculonan den custodia TUR VEHICULO CU WORDO KITA DOR POLIS TA BAY R.S.I.

MACUARIMA, ARUBA: Cuerpo Policial Aruba ta informa comunidad cu entrante 7 di juli 2025 tur vehiculo cu wordo kita door di polis lo wordo hiba den custodia (ter bewaring) na R.S.I. (Recovery Solutions & Investigation) situa na Avenida Milio Croes 40 A, Dakota ex Malboro Ball Park. (esaki ta exclui vehiculonan cu a wordo confisca como obheto di un investigacion penal)

Manera ta conoci dia 20 maart 2025 a tuma lugar un destaho publico y e compania R.S.I. a wordo escohi pa cu e proyecto di "Bewaring, Opslag en

Takeldiensten KPA".

E compania R.S.I. lo tin como tarea entrante 7 juli 2025:

- Nan ta encarga pa takel e vehiculo cu wordo kita door di polis y hibanan na e localidad di R.S.I. situa na Avenida Milio Croes
- Ta percura pa warda e vehiculo y ta responsabel pa cu esaki.
- R.S.I. lo tin den custodia tur vehiculo cu wordo kita dor di Polis.
- E orario cu e doño por busca nan vehiculo ta di dialuna pa diasabra di 09:00 am pa 8:00 pm na R.S.I.
- Pa por haya e vehiculo bek e doño mester

presenta cu e documentonan valido. Paga e costo di takel y e wardamento. Esaki ta conforme articulo 20 y articulo 30 di Landsverordening Wegverkeer (AB 1997 no 18), articulo 1 sub B y C, articulo 5 y 6 di Retributie- en Legesbesluit Korps Politie Aruba 2002 (AB 2003 no. 4).

E pago ta solamente via swipe machine. No ta acepta cash. Esaki ta wordo paga na R.S.I. su oficina.

E costonan ta como lo siguiente :

- Pa takel e vehiculo ta Afl. 175,-
- Si e vehiculo p.e. wordo hala for di caminda y



poni un banda esaki ta Afl. 75,-

- Pa cada dia cu e vehiculo keda na R.S.I. tin un costo di Afl 25,-

Tene bon na cuenta cu si bo no bin busca bo vehiculo den 48 ora, bo persona lo ricibi

un carta na cas na unda cu esaki ta mara na gastonan adicional.

Despues di 90 dia cu e vehiculo keda den custodia, esaki lo wordo bendi na findishi of e lo wordo destrui si e no wordo bendi.

MINISTER DOWERS A HACI BISHITA DI SORPRESA NA KAZERNE DI BRANDWEER NA AEROPUERTO

Diaranson mainta, Minister di Husticia mr. drs. Arthur Dowers a haci un bishita di sorpresa na Post Oscar, cu ta e Kazerne di Brandweer situa na Aeropuerto Internacional Reina Beatrix.

Minister Dowers a topa cu e personal di brandweer cu a dune un recorrido improvisa rond di e facilidad y a splica e mandatario di husticia di tur e retonan cu nan tin desde algun aña atras. Tin un falta enorme di material pa e personal por bay den accion di manera efectivo y sigur, manera brandweerpak nobo,

mirando cu e personal tin cu recicla esakinan apesar cu nan a surpasa nan uzo maximo. Post Oscar ta cumpli minimal cu e ekiponan manera e Aircraft Rescue and Fire Fighting trucks miho conoci como "crashtrucks" pa por sirbi aeropuerto, pero tin un necesidad enorme pa por yega e nivel segun normanan internacional.

Minister Dowers ta consciente cu tin un plan pendiente pa expande y renoba e facilidad na aeropuerto pero ta lamenta si cu e parti di limpieza y mantencion

di e facilidad existente ta un problema structural cu a surgi durante di e ultimo 7 añanan. Ademas e personal di Post Oscar ta traha den un situacion deplorabel y e ultimo controlnan cu a tuma luga a indica cu e post aki no ta na e nivel cu e mester ta. Prome cu merdia ya caba DOW a tuma accion di limpieza.

Minister ta satisfecho si cu apesar di e situacion deteriora, e personal ta motiva pa haci tur locual ta den nan alcance pa cumpli cu nan responsabilidad y trece brandweer bek na e nivel cu e mester ta.



Segun Minister Dowers, "Mester traha mas duro y mester traha mas organisa y mas sistematico". "Tempo cu a mi a bay como minister, nos a laga

diferente tenders cla caba pa e material nobo bin, cual a bin for di desde nos tempo, despues di esey, a drumi riba cierto aspecto, locual no por", Minister Dowers a expresa.

OPORTUNIDAD PA FORMA PARTI DI FORMACION SOCIAL: INSCRIPCION TA HABRI TE COMIENSO DI AUGUSTUS



SVT ta habri inscripcion pa forma parti di Formacion Social grupo 20 y duna e hobennan entre 17 y 25 aña un segundo oportunidad den nan bida.

Mayornan cu ta interesa pa nan yiu forma parti di e proyecto aki, por tuma contacto cu Sra. Jessica Ras, na 564-5339 y asina inicia cu e proceso di aplicacion. Ta bon pa tene cuenta si cu e cuponan ta limita y cu inscripcion lo cera na comienso di augustus 2025. Parti di e trayectoria di inclui disciplina, estructura, siña conoce nan mes, traha den team, kico ta encera eherce/mantene un trabao y comunicacion.

Coordinador di curso y training di SVT, Lourenço Teixeira Capitan di Arumil, a informa cu dia 18 di augustus lo duna inicio na SVT 20, pero dia 5 di augustus lo tuma luga un sport test, pa cual cada participante lo mester ta bon prepara. Ta haci un yamada na e hobennan cu kier forma parti di e programa di Formacion Social, pa busca e

informacion necesario y acerca esunnan encarga.

Ademas ta recorda cu tin oportunidad di sigui e opleiding di ARUMIL, cu lo tuma luga na Corsou, y ta uno mas dirigi pa bira militar. SVT lo ta mas un fase di e opleiding militar y ta dura cuater luna, caminda nan lo experencia e bida similar di un militar na Kazerne. SVT ta inclui tambe entrenamiento den mondi, cu ta forma parti di e aspecto militar.

E escogencia pa drenta SVT hopi biaha ta bin via motivacion di mayornan, of e hoben cu no ta na scol of no a dicidi ainda ki direccion e ta bay tuma ainda den su bida. Pa e hobennan aki esaki lo ta un empuhe pa forma parti di Formacion Social (SVT). E ta un trayecto / formacion fisico, cu estructura, norma y balornan pa asina brinda cada hoben un miho oportunidad den bida.



Francielle Lacle:

“NOS TIN UN META CLA: 100 MIL MATA PA UN ARUBA MAS BERDE Y RESISTENTE”



Cu gran orguyo y speransa, Francielle Lacle di e Ministerio di Naturalesa y Medio Ambiente, a hiba palabra durante e lansamento oficial di e Proyecto di Reforestacion di Aruba, un iniciativa ambicioso di Gabinete AVP-FUTURO pa planta 100 mil mata rond di e isla, den e proximo 4 año.

"Nos ta na e momento corecto pa tuma accion. E meta ta grandi, pero nos tin fe cu, hunto cu nos comunidad y stakeholdernan, nos por logra esaki," Lacle a expresa durante e ceremonia di lansamento na Oranjestad.

E matanan lo ta planta

den zona urbano y rural, incluyendo mondi, barrio, scolnan y espacionan publico. E beneficiannan ta hopi: pa e area urbano, mas sombra y temperatura mas fresco; pa e medio ambiente marino, menos sedimentacion riba nos coralnan; y pa e biodiversidad, un aumento den e variedad di especie y proteccion di matanan endemico y menasa.

E proyecto ta cay bou di e plan nacional pa biodiversidad cu Aruba a desaroya pa 2024-2030, yama NBSAP (National Biodiversity and Strategic Action Plan). Lacle a enfatisa cu e sorto di matanan lo inclui matanan



di fruta, matanan endemico y matanan cu ta den peliger di desaparce. Ministerio di Cultura y Medio Ambiente ta ehecuta e proyecto aki hunto cu 27 organisacion local, incluyendo no solamente entidadnan ambiental manera Ban Lanta y Planta, Syntropic Farming, Ecoliving y Aruba Conservation Foundation, pero tambe negoshi, scol, sector turistico y priva. "Nos no ta haci e trabou nos so. Nos kier empodera y uni e esfuersonan cu ya ta wordo tuma," Lacle a enfatisa.

Como siguiente paso, lo forma un stuurgroep cu lo sirbi como grupo di guia, y un klankenbord dinamico, unda organisacionnan por duna input riba tema relevante, manera maneho di awa. "Esaki ta un proceso participativo, un movcion pa yega na un Aruba mas berde, mas fresco y mas fuerte," Lacle a conclui.



Clasificados



SOLODIPUEBLO@GMAIL.COM
CEL. 585 9500



CAS PRINCESA ARUBA CU PROYECTO “COOKIES FOR A CAUSE”



Recientemente e reinanan di Cas Princesa Aruba a tene nan obra social pa 2025 titula “Cookies for a cause”.

Un di e parti cu e reinanan tin cu cumpli cu ne ta esun social caminda nan ta kies un instancia, traha na su bienestar y organisa obra cu por sostene e instancia, si ta posibel, financieramente. E aña aki a kies pa Aruba Animal Shelter.

Na Club Don Bosco, Noord 3 reina a participa na e obra social. Nan tabata: Princess Beauty Aruba Hailey Comenencia, Little Beauty Aruba Carly-Yenne Maduro y Preteen Beauty 2024 Samantha Romero. E Preteen Beauty 2025 Mia McCollum no a participa como cu e no tabata na Aruba.


E tarea tabata pa nan traha cuki di diferente sabor y bende esakinan den cantidad di 4 den paki na publico.

For di aki Cas Princesa Aruba ta gradici e mayornan y tambe e publico cu e aña aki a sostene e causa bunita aki. Dentro di poco Cas Princesa Aruba lo anuncia cuanto a recauda pa Aruba Animal Shelter.

Mayornan cu ta desea pa nan yiu ta parti di e concurso di Miss Beauty Aruba 2025, 2026 por tuma contacto cu juffrouw Jessica Anthonij na number 7399449 of por bishita e pagina di Cas Princesa Aruba riba Facebook of Instagram.



HOMENAJE NA REMBRANDT DI GN TIN ATENCION INTERNACIONAL



Diadomingo 20 di juli, e pintor di Deventer GN (www.gustavenouel.nl), tin e oportunidad atrobe pa comparti cu publico presente, como artista invita especial, su performance 'HOMENAJE NA REMBRANDT', den tecnica universal di pintornan riba caya.

Esaki lo tuma luga riba plaza GROTE KERKHOF, band'i LEBUÏNUSKERK y dilanti Stadhuis di Deventer. Den 'curazon' di Deventer...

Pa su pintura-performance 'HOMENAJE NA REMBRANDT', cu a ser presenta internacionalmente den pasado, e Arubiano ta sigi ricibi invitacion tanto local como internacional. Ainda performance 'HOMENAJE NA REMBRANDT' di GN tin atencion internacional...

Paul Moerkerken, organisador y president di 'Fundacion Arte y Cultura na IJssel', kier purba transforma plaza GROTE KERKHOF den un plaza manera na Place du Tertre di Montmartre, París, o den un plaza di artista manera na otro ciudadnan metropolitano o luganan turistico importante. Su objetivo ta crea un plataforma nobo pa artista na Deventer, cu lo inclui tur disciplina artistico cu su fundacion ta promoviendo. Como parti di e iniciativa nobo aki, e organizador a hasta inclui un proyecto di pintura-performance 'HOMENAJE NA REMBRANDT', di un artista Arubiano, inspira p'e retratista mas famoso di tur tempo, Rembrandt van Rijn. (<https://kreolmagazine.com/culture/art/gustave-nouel-a-modern-art-virtuoso/>).

Aparentemente 'HOMENAJE NA REMBRANDT' di GN ta den sintonía perfecto

cu ambicion di e organizador y su fundacion. Fundacion 'Arte y Cultura na IJssel' ta ofreciendo desde cuminsamento di e iniciativa na 2024, un plataforma especial na e famoso pintor y artista Arubiano di Deventer Gustave Nouel (GN) cu su pintura-performance 'HOMENAJE NA REMBRANDT'... Un plataforma regional, cu GN como invitado especial ta comparti cu miembronan di Asociacion di Artista DAK (<https://www.deventeramateurkunstenaars.nl/>), caminda GN, cu su formacion post-academico, ta guiando artista regional di tur nivel. Tambe e Arubiano ta comparti su experiencia y conocimiento di 'street-artist' y pintor internacional, cu artistanan di DAK y di region. Artista di tur nivel cu pasion pa Arte, di aspirante te especialista, hasta docente di arte y artista academico, ta miembro di DAK, caminda Gustave y algun otros artista/docente lider, a ser aserca pa guia nan colega artista pa nan por sigi specialisa den diferente tecnica desea. Asociacion di artista DAK a acerca y contrata Gustave como asesor y docente lider algun aña pasa, principalmente pa su expertise den pintamento di portret riba caya. GN a comparti 'secreto universal' y 'triki', di artista riba caya na Kunstcircuit, cu tabata e Centro Cultural mas importante di region. Den su juventud, e artista-pintor Arubiano a traha cu pintor y artista di henter mundo riba caya y plaza, internacionalmente.

Den LEBUÏNUSKERK, banda di plaza GROTE KERKHOF, tambe lo tin un exposicion dje artistanan di DAK te dia 3 di Augustus. GN, como asesor/docente di DAK, tambe lo expone un pintura, 'curiosamente' titula: 'MI HOMENAJE NA REMBRANDT'...

MINISTER GERLIEN CROES TA FELICITA SELECCIONNAN U6, U10 Y U16 CU NAN LOGRO DEN ONE LEAGUE BASEBALL TOURNAMENT NA FORT MYERS

Oranjestad, 16 juli 2025 - Minister di Relacionnan den Reino, Educacion, Hubentud, Innovacion y Deporte, mr. Gerlien Croes, ta expresa su gran orguyo y felicidad pa e atletanan di Aruba cu a logra marca historia pa nos isla den baseball un biaha mas. E seleccionnan di baseball di U6, U10 y U16 cu a participa den e prestigioso One League Baseball Tournament na Fort Myers a sali cada un como campeonnan di Caribe den nan categoria — un prueba di nan talento, disciplina y orguyo Arubiano.

“E logro sobresaliente aki di nos seleccionnan ta inspira nos tur”, Minister Gerlies Croes a bisa. “Boso a demostra cu na un edad asina hoben, cu trabou duro y dedicacion, boso por pone Aruba riba e mapa y hiba nos bandera cu orguyo riba un escenario internacional den deporte. Boso ta berdadero campeonnan den tur sentido di palabra”.

Minister Gerlien Croes tambe ta gradici e mayornan, coachnan, staff y tur esnan cu a para tras di e mucha- y hobennan aki, pa a haci e logro aki

posibel. Tras di cada victoria tin un ehercito di sostenedor. E mayornan cu ta inverti tempo y amor, e coachanan y staff cu ta guia, y e comunidad cu ta kere y apoya — boso tur ta parti di e exito aki. Danki pa ta e pilar di apoyo y fortaleza pa e atletanan aki.

E victoria aki, no ta solamente trofeo, sino logronan clave den construccion di futuro deportivo di Aruba. Deporte ta siña nos muchanan e balornan cu lo dura henter nan bida: traha den ekipo, respet y ambicion.

Como minister di deporte, mi ta kere firmemente cu nos inversion den deporte pa hobennan ta un inversion den futuro di nos nacion. E atletanan aki a demostra nos dicon. Nan ta laga nos mira cu nos futuro ta briyante — paso hobennan determina, talentoso y cu speransa ta construyendo esaki.

Deporte no ta solamente wega — deporte ta clave pa un Aruba mas saludabel, mas fuerte y mas uni. Laga nos sigui sostene y kere den nos atletanan, paso asina so nos ta forma e campeonnan di mañan.



MINISTER GERLIEN CROES TA FELICITA E CAMPEONNAN DI LITTLE LEAGUE DI ARUBA, SELECCION U-12 TA LOGRA SALI CAMPEON BACK TO BACK DI CARIBE!



Oranjestad, 16 di juli 2025 – Cu un gran sentido di orguyo nacional, Minister di Relacionnan den Reino, Educacion, Hubentud, Innovacion y Deporte, mr. Gerlien Croes, ta felicita nos talentoso muchanan di Aruba Little League, hunto cu nan coach y staff, pa logra un victoria historico na Little League Caribbean Tournament 2025 cu a tuma luga na Corsou. Aruba a logra defende su titulo di 2024 y a keda Back to Back Campeon di Caribe – un logro deportivo cu ta pone Aruba riba e mapa internacional un biaha mas.

E torneo a conta cu participacion di e mihor ekiponan di Caribe, pero nos yiu di tera a demostra disciplina, union y amor pa e deporte, representando Aruba cu pasion, respet y

liderazgo deportivo. Nan victoria ta un inspiracion pa tur hoben Arubiano cu ta soña grandi y cu ta desea pa sobresali den deporte. Minister Gerlien Croes a expresa su admiracion y reconocimiento pa e esfuerzo colectivo di e ekipo, staff tecnico, coachnan, y tambe e famia y voluntarionan cu ta pone man pa sostene e muchanan na cada paso. "Nan entrega, dedicacion y trabou di ekipo ta muestra nos tur kico ta posibel ora bo kere den bo mes y tin apoyo durante e trayectoria. Esaki ta un logro grandi un biaha mas pa Aruba", Minister Gerlien Croes a destaca.

Awor cu Aruba oficialmente a clasifica pa e prestigioso Little League Baseball World Series na Williamsport, Pennsylvania, cu lo

tuma luga di 13 pa 24 di augustus, e seleccion lo continua mesora cu e fase di preparacion. E torneo mundial aki ta un plataforma unico pa representa no solamente Aruba, pero tambe Caribe completo.

Ministerio di Deporte, hunto cu nos comunidad deportivo, ta compromete pa duna e apoyo necesario



pa prepara nos muchanan pa Williamsport – un reto cu un oportunidad grandisimo. PABIEN! y

EXITO! na nos seleccion, coachnan y staff di Little League.

Oracion di dia

Un dia bendiciona cu hopi forza y paz di Señor.

TUR CU TA CANSA Y CARGA, BINI CERCA MI Y AMI LO DUNA BOSO SOSIEGO.(MATEO 11,28)

Señor ta yama nos pa bini cerca djE, tur momento, den situacionnan bon y menos bon. Cerca djE nos por bay pa deshoga nos curason y nos por ta sigur, cu nos lo haya alivio. Pasobra nos no por haci nada sin djE.

Loke Hesus kier ta pa nos imit'E den misericordia y bondad.

Dios lo no muestra misericordia, ora cu E husga esun cu no tabatin misericordia cu otro hende, pero esun cu si tabatin misericordia lo sali victorioso na momento di huicio.(Jacobo 2, 13) Nos mester ta cla pa tene misericordia cu esnan cu ta maltrata nos, y nos mester ta cla pa haci bondad, sea un bon hende pa nan cu ta cerca bo, pa nan cu conoce bo y pa esnan cu bo ta topa riba caminda di bo bida.

Oracion: Señor mi ta yama danki na Bo cu ta yama nos tur ora bay pa bini cerca Bo. Pa Bo yena nos cu forza, paz y duna nos sosiego pa medio di Cristo nos Señor. Amen.

FORTALEZA PA FAMIA

Scirbi pa Pastor Marcel Balootje.

PIDI Y LO BO HANJA, DIOS TA UN TATA RESPONSABEL PA SU YUINAN

Tur hende mester sa:
No ta posibel cu den un matrimonio y Famia,
\
E muher ta stroba e homber di sirbi Dios.
Of e homber ta stroba e muher di sirbi Dios, of e yuinan ta stroba nan mayornan di sirbi Dios,
Dios ta bini semper na prome lugar, nos mester kita tur piedra di tropieso, y pone nos cas na ordo, y nos bida na ordo pa asina nos por sirbi Dios constantemente, yen di fe y anhelo pa Su presencia.

Pasobra Dios ta responsabel pa nos. No laga nada stroba boso di sirbi Dios.

Locual tin para scirbi den Mateo 7;7 ta palabra di compromiso, y responsabilidad cu Dios tin cu tur esnan cu ta kere den Dios.

Dios su palabra ta bisa nos cu tur cos ta posibel si bo ta kere, locual ta imposibel pa hende ta posibel pa Dios.

Pidi y lo wordo duna na boso, busca y boso lo hanja, bati y lo wordo habri pa boso. Pasobra ken cu pidi lo ricibi, y esun cu ta busca ta hanja, y pa esun cu bati lo wordo habri.

Den Exodo 20:3 ta para scirbi : Bo no mag di tin otro dios mi dilanti.
Nos tin cu realisa. cu Dios no kier pa nos ta infiel, e kier pa nos ta hende loyal, cu ta confia den Dios, y cu ta depende riba Dios constantemente. Dios Tata Todopoderoso ta suficiente pa nos.

Mester evita tur momento cu nos relacion cu Dios ta mengua of wordo perhucica pa motibo di hende of material, pasobra tur esey ta cosnan cu nos no por permiti, pasobra si nos wak bon rond di nos e amigo di mas fiel cu nos tin ta Dios.

relacion cu Dios tabata temendo, awor cu nos a casa e relacion cu Dios no por fria, nos no por bira floho, pasobra dos a bira uno y e prome cos cu nos tin cu haci, ta sirbi Dios cu mas fervor, pasobra awor nos tin mas forza pa sirbi Dios, pasobra e a uni nos na prome lugar pa nos por sirbi'E.

Kico cu presenta den bo bida, cu ta stroba bo di sirbi Dios, y ta stroba bo ministerio, bo mester tene bon cuenta cune, especialmente den bo amistadnan, pasobra ningun di nan por ta mas importante cu e presencia di Dios den bo bida, pasobra amigonan lo bandona bo, y corre bay laga bo den e momento di mas necesidad, pero Dios nunca lo bandona ni tampoco desampara bo.

Pesey su palabra ta bisa; lo Bo warda den pas perfecto, esun cu su pensamiento ta permanece den Bo, pasobra e ta confia den Bo, Confia den Senyor pa semper, pasobra den Dios e Senyor nos tin un Baranca eterno.(Isaias 26:3-4).

Pesey nos mester tene cuenta, con nos ta trata nos Dios, y no trata Dios con cu ta, no purba di usa Dios su nomber y nos no ta kere den su poder, pasobra ta esey nifica bofon, y Dios no ta laga hende haci bofon di Dios, e ta para tur cos pa asina hende sinja respeta su presencia y su poder. (Numbernan 16:20).

No preocupa pa nada, ma den tur cos, pa medio di oracion, y suplica cu gradicimento, laga boso petitionnan ta conoci dilanti di Dios. Y e pas di Dios cu ta surpasa tur comprendemento, lo warda boso curason y boso mente den Cristo Hesus.(Filipensenan 4:6-7).

Ma busca prome e reino di Dios y Su husticia y tur e cosnan aki lo wordo anadi na boso.(Mateo 6:33).

Sinceramente, Pastor Marcel Balootje.

SUDOKU

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		7	1				5	
				7	4	8		
	2		3	8			7	6
				4	8		1	9
		8				5		
6	9		5	3				
8	7			1	9		3	
		3	8	5				
	1				3	9		

BON NOTICIA

E UNICO IGLESIA UNIVERSAL DI CRISTO-HESUS PA DRENTA GLORIA DI DIOS, TIN MAS CU 2000 ANJA

ijbel Mateo 26: 26 – 28, den e ultima cena Hesus a bisa Su apostelnan: “Boso tur bebe for di e copa di binja aki, esaki ta Mi Sanger, e Sanger cu ta confirma e Aliansa cu Mi ta derama pa hopi hende, pa pordon di pikanan.” Akinan Hesus ta confirma Su Sacrificio y morto na crus, deramando Su Sanger precioso, pa e Aliansa Nobo di Dios Tata, cu ta e pueblo Nobo di Herusalem. Bijbel Lucas 1: 32 – 33, ta bisa: “Senjor Dios lo duna Hesus e trono di Su antepasado Rey David y te den eternidad lo E ta Rey di e descendientenan di Jacob y Su Reino lo no tin fin.” Bijbel Mateo 16: 15 – 19: “Hesus a puntra Su apostelnan: Anto boso mes, ta ken boso ta bisa Mi ta? Simon a contesta: Bo ta E Mesias, E Yiu di Dios bibo! Hesus a bis’e: Felis bo ta Simon yiu di Huan, pasobra no ta hende a revela bo esaki, ma Mi Tata cu ta den Cielo. Mi ta bisa bo: Abo ta Pedro (o sea baranca) y riba es baranca aki, lo Mi lanta Mi Iglesia y forsan di fierno lo no podera di dj’e. Lo Mi duna bo e yabanan di Reino di Cielo y loke bo prohibi na tera, ta prohibi den Cielo tambe y loke bo permiti na tera, lo ta permiti den Cielo tambe.” Akinan Hesus ta bisa bon cla, Mi Iglesia, osea un solo Iglesia y no Iglesiasnan. E demonionan den fierno lo lanta diferente sectanan na mundo, pa podera y pa kibra e Iglesia di Hesus, pero nan lo no logra. Hesus a duna Simon e nomber Pedro, cu ta significa baranca, cabes visibel di Su Iglesia.

Hesus a duna Pedro e yabanan di Reino di Cielo y esaki ta significa, cera y habri e portanan di Reino pa laga e almanan dreña den Reino di Cielo. Den e unico Iglesia di Cristo-Hesus, tin e yabanan di e portanan di Reino di Cielo. Hesus a duna e autoridad na Pedro pa dirigi Su Iglesia, di loke ta permiti y di loke ta prohibi.

Bijbel Marco 16: 15 – 16, aki Hesus ta bisa Su apostelnan: “Sali pasa na henter mundo y predica e Evangelio pa henter humanidad.” E palabra, sali pasa na henter mundo y predica e Evangelio pa henter humanidad, ta significa, Universal, Hesus Su Iglesia mester ta Universal. E Iglesia Universal di Hesus, ta e pueblo Nobo di Israel. Awor, tur hendenan na mundo, sectanan y e Hudiunan mes, nan mester kere den Cristo-Hesus y nan mester dreña y bautisa den E Unico Iglesia Universal di Hesus, pa nan por dreña den e Reino di Cielo. Hesus a institui tambe, Su doctrinanan di Gracianan di salvacion pa Su Iglesia: Bautismo Mateo 28: 19 – 20, Confirmacion Echonan di Apostelnan 2: 1 – 4, Confesion Huan 20: 23, Eucaristia Lucas 22: 19 – 29, Matrimonio Mateo 19: 4 – 6, Apostolado Marco 3: 13 – 19, Enfermonan Hacobo 5: 14 – 15. Awor puntra bo mes, ta di con tin tanto sectanan na mundo y mientras ta un Iglesia Hesus a lanta? Awel na anja 1521, Martin Luther un frere, teologo aleman a bai contra di e Iglesia Universal di Cristo-Hesus.

El a inventa e teoria di e interpretacion liber di Bijbel. E interpretacion liber aki, a produci 36.000 diferente sectanan y oposicionnan na mundo. Tur e sectanan aki, ta pretende di ta di Hesus. Durante tempo a trece hopi division y hopi di nan a lanta nan mesun religionnan, sectanan y predicando e Bijbel den nan mesun manera y buscando hendenan debil den fe pa sigi nan. Martin Luther a bira Protestant, pasobra el a protesta contra e Papa di Iglesia Universal di Cristo Hesus. Den Bijbel Echonan Apostelnan 20: 28 – 30, carta di San Pablo na su coleganan Apostelnan: “Cuida boso y di henter e rebanjo na cual Spirito Santo a pone boso como Obisponan pa warda e Iglesia di

Senjor, na cual E’l a gana cu Su propio Sanger. Mi sabi cu despues di mi partida, lo dreña lobonan feros cu lo no tene compasion cu e rebanjonan y cu denter di boso mes, lo surgi hendenan cu lo sinja doctrinanan robes y nan lo gana discipelnan nan tras.

” Ta manera cu Hesus a bisa den Bijbel Mateo 16: 18, cu forsan di fierno lo purba podera y kibra e Unico Iglesia Universal di Hesus, pero nan lo no logra. Den Bijbel Revelacion 21: 10-14, ta bisa, di e ciudad Santo di Herusalem cu ta bahando di Dios for di Cielo, briyando di Dios Su Gloria. E muraya di e ciudad tabata tin diesdos piedra di fundeshi grandi y riba nan, e diesdos nomber di e diesdos Apostelnan di E Lamchi tabata scirbi. Esaki ta e diesdos nombrenan scirbi riba e diesdos Portanan di Reino di Cielo. Awor husga pa bo mes, e Unico Iglesia Universal aki di Cristo-Hesus, tin mas cu 2000 anja y a wordo lanta pa medio di e 12 Apostelnan di Hesus. Nan tabata e prome Obisponan y San Pedro tabata e Prome Papa, e prome cabes visibel di Cristo-Hesus Su Iglesia. E palabra Universal ta significa, Catolica. Compronde bon, ta un Iglesia so tin pa dreña Gloria di Dios y Hesus a institui Su doctrinanan aki pa nos cumpli cu nan. Nunca no ta laat pa compronde y pa sa e berdad.

Scirbi pa Seferino Tromp
Un mensahero di Dios.

Seferino Tromp
Koyari 13-D tel. 5931157 / 5870048
ID. 57.11.22.40
E-mail: etajuni@yahoo.com

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



TURISTA

Nos tur ta un turista
Cu un bon bista
Riba nos isla
Cu su beachnan
Sin igual, unico y special
Tin Arucamba y Arucano
Y mas combinacion
magico y floria
No ta importa bo religion
Of rasa, ni preferencia
politico of di ofishi
Si aki bo lombrishi
Ta dera
Bo antepasadonan

Y ancestronan cu tempo
Mas y mas den bo ser
ankra y pega, sigui crese
Y cu gracia trese
Mas lus den e alma
No mas esclavo
No mas discriminacion
Dios a crea y Dios ta bon
Dios semper ta bon
Ora bo habri bo curason
Y trata otro bon
Cu respet
Ora bo duna danki
Pa cada les, experiencia

Y bendicion.
Y como turista sigui
Biaha den bo aventura
Di nacion pa nacion
Riba bo mesun isla
Sigui topa otro den nan
cultura sin lubida esun di
bo, cu ta den bo curason
mente y alma graba
Y cu nunca por evapora.

Ruthy" Lady Ruth"

AVB KIER INFORMA CU UN
BIAHA MAS 3 REFEREE TA
WORDO SELECTA PA BAI DIRIGI
CFU CLUB SHIELD 2025 NA
TRINIDAD & TOBAGO

Nos ta papia kinan di :
Jerwin Giel (Referee)
Ricangel de Leça (Referee
FIFA)
Tristan Vermeulen (
Assistent Referee FIFA)





Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - July 16, 2025

 Sorteo # 4682 1527 4519 6898  FP  Sorteo # 4682 2725  X2  Sorteo # 2738 4071  Sorteo # 4682 3444 Piscis  Sorteo # 1556 222  X2	 Sorteo # 0 x Jackpot 0 x Match 4+ 0 x Match 4 0 x Afl. 12,00 Joker Letter Proximo Jackpot 235.000,-	 Sorteo # 0 x Jackpot 0 x Match 4 0 x Afl. 8,00 Joker Letter Proximo Jackpot 58.000,-	 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot 270.000,- Afl. 380.000,-	 Sorteo # 
---	---	---	---	--



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - July 16, 2025

 Sorteo # 8596 4341 6955 7310  FP  Sorteo # 7640 0090  FP  Sorteo # 2345 1511  Sorteo # 6399 4244 Piscis  Sorteo # 1328 941  X2	 Sorteo # 2608 0 x Jackpot 0 x Match 4+ 0 x Match 4 0 x Afl. 12,00 Joker Letter Proximo Jackpot 235.000,-	 Sorteo # 6887 0 x Jackpot 8 x Match 4 181 x Afl. 8,00 05-07-09-18-22 Proximo Jackpot 58.000,-	 Sorteo # 1784 0 x Jackpot 0 x match 4 1 x Afl. 500,00 45 x Afl. 50,00 47 x Afl. 15,00 Mega Ball 14 Proximo Jackpot 270.000,- Afl. 380.000,-	 Sorteo # Sorteo # 202 184128 #VALUE! 
--	--	--	---	---

Minister di Infraestructura, Rene Herde:

**“MATA TA CUMINSA
CHIKITO, PERO TIN
IMPACTO GRANDI –
Y NOS LO SIGUI CU
INFRASTRUCTURA CU TA
SOSTENE CRECEMENTO”**



Na ocasion di e lansamento oficial di e Proyecto di Reforestacion di Aruba, e recién apunta Minister di Infraestructura, drs. Rene Herdé, a duna su prome discurso como minister na e publico presente cu un mensahe di humildad y determinacion. E proyecto ambicioso ta busca pa, hunto cu 27 organisacion partner y e comunidad Arubano henter, planta 100 mil mata den 4 año.

“E rotonde aki por parce chikito, pero ta laga nos pensa riba con tur mata grandi a cuminsa un dia, chikito. Asina mes nos por wak e proyecto di reforestacion: un simia chikito cu por bira un legado duradero,” Minister Herdé a bisa. El a agrega cu e impacto di e proyecto ta bay mas leu cu simplemente estetica. Ta trata aki di mehora nos temperatura, fortifica nos tera, proteha nos awa di suela y fortalece nos medio ambiente.

Minister Herdé a enfatisa cu bou di e Ministerio di Infraestructura, e rol no ta limita na asina yama “trabao tecnico”, sino un rol sostenedo y facilitado di e mesun tipo di proyecto. “E departamentonan cu ta forma parti di nos ministerio: cuido di caminda, drenahe, mantencion di espacio publico y planificacion urbano, ta esunnan cu lo crea e condicion pa e matanan crece y pa e proyecto realmente florece.”

Minister Herdé a subraya cu pa logra e meta di 100 mil mata, mester un infraestructura bon planea: “nos lo tin cu prepara e espacionan, coordina cu e sectornan relevante y traha mantencion continuo,” Minister Herde a expresa.


E mandatario a expresa su gratitud pa e liderazgo di Ministerio di Naturalesa y Medio Ambiente y tur e organisacionnan cu a uni den e movimiento aki. “Mi tin confiansa den esunnan cu a tuma e iniciativa. Mi trabou lo ta pa yuda e mata crece, no solamente den su raiz, pero den e estructura cu lo mantene su crecimiento.”

Minister Herdé a finalisa cu un yamada pa accion: “Mi ta gradici bosonan presencia y mi ta yama nos pueblo: ban planta mata, ban sosten’e, ban haci Aruba bira un isla mas berde y resistente.”

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita
Laga esakinan termina den tur bunitesa

**Cu immenso dolor den nos curason, pero conforme cu
boluntad di Dios nos ta participa fayecimento di:**

Na bida:
Officier in de Orde van Orange-Nassau,
Ex-Diputado di Aruba,
Ex-Miembro di Eilandsraad Aruba,
Ex-Consehero di Gabinete di Ministronan di Antiyas,
Fundador y ex-director di Bureau Intellectuele Eigendom (BIE)
Aruba Lions Club (Past President, Past Regional Governor, Past Chairman Council of Governors)
Fepoh (Actual Presidente)
Actual Miembro di Board of Trustee Xavier University School of Medicine & Nursing
Masonic Blue Degrees and Higher Degrees



FRANK H. CROES
*3 Juni 1944 – †12 Juli 2025

Na nomber di:

Esposa: Bibiana “Baby” Croes-Feliciano

Yuinan: Edward y Sharon Croes, Irving Croes y Selva Erasmus

Nieto(a)nan: Irving Shawnn y Karen, Deacon, Thara, Ariana, Dwayne

Tata: †Frans (Fanfa) Croes
Mama: †Irma Croes

Rumannan: Michael y Nel Croes y yuinan Dennis y Robin, Mirella y Orlando Trimon y yui Darell

Omo y Tantanan na bida:
Maiky Croes y famia,
Lucho y Maria Croes y famia,
Stella Croes y famia,
Helen y Juni Oduber y famia
Demas Omo y Tantanan: Croes, Marugg, Lacle, Oduber, Henriquez

Swa y Cuñanan: Feliciano, Vrolijk, Maduro, Henriquez, Hart, Bislik, Jansen

Tur primo, primanan y demas famia.
Tur su bon amigonan, ihanan, bisiñanan y conocirnan.

Si den nos tristeza nos por a lubida algun famia, amigo of ser keri, nos sincero disculpa.

**Acto di condolencia y despedida lo tuma lugar diasabra 19 di juli 2025
na Aurora Funeral Home di 6:00 pa 9:00 pm. Cremacion ta tuma
lugar den seno di famia.**

Despues di entierro no ta ricibi bishita di condolencia na cas.

Enbes di flor of krans un donacion na Fepoh lo ta altamente aprecia.